

KinyaRwanda - Umwuka Intambara Ibyanditswe - SW Intro Scriptures

Luka 17:5 Maze intumwa zibwira Umwami Yesu ziti “Twongerere kwizera.”

Abanyaroma 10:17 Dore kwizera guheshwa no kumva, no kumva

kukazanwa n'ijambo rya Kristo.

Luka 11:1 Nuko ari ahantu hamwe asenga, arangije umwe mu bigishwa be aramubwira ati “Databuja, twigishe gusenga nk'uko Yohana yigishije abigishwa be.”

1 Timote 2:1-4 Irya mbere ya byose ndaguhugurira kwingingira abantu bose, no kubasengera no kubasabira no kubashimira, 2 ariko cyane cyane abami n'abatware bose kugira ngo duhore mu mahoro tutabona ibyago, twubaha Imana kandi twitonda rwose. 3 Ibyo ni byo byiza byemerwa imbere y'Imana Umukiza wacu, 4 ishaka ko abantu bose bakizwa bakamenya ukuri.

Zakariya 3:1,2 Maze anyereka Yosuwa umutambyi mukuru ahagaze imbere ya marayika w'Uwiteka, na Satani ahagaze iburyo bwe ngo amurege. 2 Uwiteka abwira Satani ati “Uwiteka aguhane, yewe Satani. Ni koko Uwiteka watoranyije i Yerusalem aguhane. Mbese uwo si umushimu ukuwe mu muriro?”

Abanyaefezi 6:12 Kuko tudakirana n'abafite amaraso n'umubiri, ahubwo dukirana n'abatware n'abafite ubushobozi n'abategeka iyi si y'umwijima, n'imyuka mibi y'ahantu ho mu ijuru.

Abanyaefezi 6:10,11 Ibisigaye mukomerere mu Mwami no mu mbaraga z'ubushobozi bwe bwinshi. 11 Mwambare intwaro zose z'Imana, kugira ngo mubashe guhagarara mudatsinzwe n'uburiganya bwa Satani.

Abanyaefezi 6:13-17 Nuko rero mutware intwaro zose z'Imana, kugira ngo mubashe gukomera ku munsi mubi, kandi murangije byose mubashe guhagarara mudatsinzwe. 14 Muagarare mushikamye mukenyeye ukuri, mwambaye gukiranuka nk'icyuma gikingira igituza, 15 mukwese inkweto, ari zo butumwa bwiza bw'amahoro bubiteguza, 16 kandi ikigeretse kuri byose mutware kwizera nk'ingabo, ari ko muzashoboza kuzimisha imyambi ya wa mubi yose yaka umuriro. 17 Mwakire agakiza kabe ingofero, mwakire n'inkota y'Umwuka ari yo Jambo ry'Imana,

Abehebureyi 4:12 Kuko ijambo ry'Imana ari rizima, rifite imbaraga kandi rikagira ubugi buruta ubw'inkota zose, rigahinguranya ndetse kugeza ubwo rigabanya ubugingo n'umwuka, rikagabanya ingingo n'umusokōro kandi rikabangukira kugenzura ibyo umutima wibwira ukagambirira.

Luka 4:8 Yesu aramusubiza ati “Handitswe ngo ‘Uramye Uwiteka Imana

yawe, abe ari yo ukorera yonyine.' "

Abanyaefezi 6:18 musengeshe Umwuka iteka mu buryo bwose bwo gusenga no kwinginga, kandi ku bw'ibyo mugumye rwose kuba maso, musabire abera bose.

1 Samweli 17:45-47 Dawidi abwira Umufilisitiya ati "Wanteranye inkota n'icumu n'agacumu, ariko jyewe nguteye mu izina ry'Uwiteka Nyiringabo, Imana y'ingabo za Isirayeli wasuzuguye. 46 Uyu munsi Uwiteka arakungabiza nkwice nguce igihanga, kandi ndagaburira ibisiga byo mu kirere n'inyamaswa z'inkazi zo mu ishyamba intumbi z'ingabo z'Abafilisitiya, kugira ngo abo mu isi yose bamenye ko muri Isirayeli harimo Imana, 47 kandi ngo iri teraniro ryose rimenye ko Uwiteka adakirisha inkota cyangwa icumu, kuko intambara ari iy'Uwiteka kandi ari we uzabatugabiza."

Luka 10:17-20 Nuko abo mirongo irindwi bagaruka bishima bati "Databuja, abadayimoni na bo baratwumvira mu izina ryawe." 18 Arababwira ati "Nabonye Satani avuye mu ijuru, agwa asa n'umurabyo. 19 Dore mbahaye ubutware bwo kujya mukandagira inzoka na sikorupiyo, n'imbaraga z'Umwanzi zose, kandi nta kintu kizagira icyo kibatwara rwose. 20 Ariko ntimwishimire yuko abadayimoni babumvira, ahubwo mwishimire yuko amazina yanyu yanditswe mu ijuru."

2 Abanyakorinti 10:3-5 Nubwo tugenda dufite umubiri w'umuntu ntiturwana mu buryo bw'abantu, 4 kuko intwaro z'intambara yacu atari iz'abantu, ahubwo imbere y'Imana zigira imbaraga zo gusensa ibihome no kubikubita hasi. 5 Dukubita hasi impaka n'ikintu cyose kishyiriye hejuru kurwanya kumenya Imana, dufata mpiri ibitekerezwa mu mitima byose ngo tubigomōrere Kristo.

Matayo 16:19 Nzaguha imfunguzo z'ubwami bwo mu ijuru, kandi icyo uzahambira mu isi kizaba gihambiriwe mu ijuru, n'icyo uzahambura mu isi kizaba gihambuwe mu ijuru."

2 Timote 1:7 Kuko Imana itaduhaye umwuka w'ubwoba, ahubwo yaduhaye uw'imbaraga n'urukundo no kwirinda.

Matayo 12:28,29 Ariko Umwuka w'Imana niba ari we umpa kwirukana abadayimoni, noneho ubwami bw'Imana buba bubaguye gitumo. 29 "Umuntu yabasha ate kwinjira mu nzu y'umunyamaboko ngo amusahure ibantu, atabanje kuboha uwo munyamaboko, ko ari bwo yabona uko asahura inzu ye?

Abanyaefezi 1:13 Ni we namwe mwiringiye mumaze kumva ijambo ry'ukuri, ari ryo butumwa bwiza bw'agakiza kanyu, kandi mumaze kwizera ni we wabashyizeho ikimenyetso, ari cyo Mwuka Wera mwasezeranijwe, Ibyakozwe 19:6 Pawulo amaze kubarambikaho ibiganza Umwuka Wera

abazaho, bavuga izindi ndimi barahanura.

Mariko 16:15-18 Arababwira ati “Mujye mu bihugu byose, mwigishe abaremwe bose ubutumwa bwiza. 16 Uwizera akabatizwa azakizwa, ariko utizera azacirwaho iteka. 17 Kandi ibimenyetso bizagumana n'abizera ngibi: bazirukana abadayimoni mu izina ryanje, bazavuga indimi nshya, 18 bazafata inzoka, kandi nibanywa ikintu cyica nta cyo kizabatwara na hato, bazarambika ibiganza ku barwayi bakire.”

1 Yohani 1:9 Ariko nitwatura ibyaha byacu, ni yo yo kwizerwa kandi ikiranukira kutubabarira ibyaha byacu no kutwezaho gukiraniwa kose.

Iyimukamisiri 20:5 Ntukabyikubite imbere, ntukabikorere kuko Uwiteka Imana yawe ndi Imana ifuha, mpōra abana gukiraniwa kwa ba se, nkageza ku buzukuruza n'ubuvivi bw'abanyanga,

Zaburi 109:17 Yakundaga kuvuma, kuvuma kwe kumugeraho, Kandi ntiyishimiraga kwifuriza abantu umugisha, Umugisha ukamuba kure.

Abacamanza 16:16 Ariko kuko yamushimikiriye iyo minsi yose akamubaza amuhata, amurembeje nk'uwenda gupfa,

Abanyaefezi 4:26 Nimurakara ntimumgakore icyaha, izuba ntirikarenge mukirakaye

Abanyaroma 14:12 Nuko rero umuntu wese muri twe azimurikira ibyo yakoze imbere y'Imana.

1 Yohani 2:23 Umuntu wese uhakana uwo Mwana ntafite na Se, uwemera uwo mwana ni we ufite na Se.

Yohani 14:6 Yesu aramubwira ati “Ni jye nzira n'ukuri n'ubugingo: nta wujya kwa Data ntamuwyanye.

Matayo 11:28-30 “Mwese abarushye n'abaremerewe, nimuze munsange ndabaruuhura. 29 Mwemere kuba abagaragu banje munyigireho, kuko ndi umugwaneza kandi noroheje mu mutima, namwe muzabona uburuhukiro mu mitima yanyu, 30 kuko kunkorera kutaruhiye, n'umutwaro wanje utaremereye.”

2 Abanyakorinti 6:2 kuko yavuze iti “Mu gihe cyo kwemererwamo narakumviye, No ku munsi wo gukirizwamo naragutabayeye.” Dore none ni cyo gihe cyo kwemererwamo, dore none ni wo munsi wo gukirizwamo.

Abanyaroma 10:13 kuko umuntu wese uzambaza izina ry'Umwami azakizwa.